



Mennta- og barnamálaráðuneytið

Reglur um úthlutun styrkja mennta- og barnamálaráðherra.

1. gr.

Markmið.

Úthlutunarreglur þessar eru settar á grundvelli 42. gr. laga um opinber fjármál, nr. 123/2015, og reglugerðar um styrkveitingar ráðherra, nr. 642/2018, og er ætlað að tryggja að gætt sé jafnræðis, hlutlægni, gagnsæis og samkeppnissjónarmiða við úthlutun og umsýslu framlaga og styrkja til einstakra verkefna á grundvelli fjárheimilda innan málefna sviða og málaflokka ráðuneytisins.

2. gr.

Auglýsing.

Mennta- og barnamálaráðuneyti skal að lágmarki einu sinni á ári birta auglýsingu um fyrirhugaðar styrkveitingar til tiltekinn flokka styrkja eða framlaga.

Í auglýsingunni skal gera grein fyrir áherslum við styrkveitingar, þeim styrkfjárhæðum sem í boði eru, hvaða skilyrði umsækjandi þarf að uppfylla til að eiga rétt til styrks eða framlags, á hvaða forni skuli skila inn umsókn, þeim gögnum sem fylgja skulu umsókn, tímafresti til að skila inn umsókn auk áætlaðs afgreiðslutíma umsóknar.

3. gr.

Umsókn.

Umsóknum ásamt fylgiskjölum, eins og við á hverju sinni skal skilað til ráðuneytisins.

Sé fjárhæð styrks eða framlags veruleg skal gera skriflegan samning um verkefnið milli aðila á grundvelli auglýsingar- og úthlutunarskilmála þar sem m.a. er tryggð fullnægjandi skýrslugjöf um framvindu verkefnisins og reikningskil.

4. gr.

Hæfi umsækjenda.

Almennt skulu styrkir skv. reglum þessum veittir íslenskum félagasamtökum. Með félagasamtökum er átt við skipulagsbundin, varanleg samtök tveggja eða fleiri aðila sem stofnað er til af fúsum og frjálsum vilja með einkaréttarlegum löggerningi í því skyni að vinna að ófjárhagslegum tilgangi.

Umsækjandi skal uppfylla eftirfarandi lágmarksskilyrði:

a. Hafa fullnægjandi aðstöðu og faglega getu til að ljúka framkvæmd verkefnisins.

b. Ef um lögaðila er að ræða skal hann geta staðfest rekstrarhæfi. Heimilt er að krefja umsækjanda um framlagningu samþykktar félags eða félagasamtaka þar sem staðfest er að starfsemi sé ekki rekin í hagnaðarskyni heldur á grundvelli samfélagslegra markmiða.

c. Ef um lögaðila er að ræða skal hann sýna fram á að hann sé ekki í vanskilum vegna opinberra gjalda eða iðgjalda til lífeyrissjóðs.

d. Hafi umsækjandi áður fengið styrk frá mennta- og barnamálaráðuneyti eða öðru ráðuneyti til sams konar verkefnis er heimilt að krefja umsækjanda um greinargerð um framkvæmd þess og ráðstöfun styrkfjárhæðar til að ný umsókn komi til greina.

Til viðbótar við framangreind skilyrði getur ráðherra ákveðið að setja frekari og sértæk skilyrði gagnvart umsækjanda fyrir úthlutun framlags eða styrks til verkefnis.

5. gr.

Viðmið við val á umsóknum.

Við mat á umsóknum um framlag eða styrk til einstakra verkefna skal líta til eftirfarandi viðmiða eins og við á hverju sinni:

- a. Hversu vel fellur verkefnið að markmiðum og áherslum stjórnvalda.
- b. Eru settir fram skýrir mælikvarðar um framgang og árangur verkefnisins.
- c. Hversu greinargóð er umsókn aðila.
- d. Hversu raunhæf er umsókn aðila.
- e. Er verkefnið að fullu fjármagnað og hver er eigin fjármögnun til verkefnisins.

Til viðbótar við framangreind viðmið getur ráðherra ákveðið að setja frekari og sértæk viðmið um úthlutun framlags eða styrks til verkefnis.

6. gr.

Almennir úthlutunarskilmálar.

Með því að þiggja framlag eða styrk til tiltekins verkefnis lýsir styrkþegi því yfir að hann ábyrgist að framlaginu eða styrknum verði einungis varið til þess tiltekna verkefnis. Jafnframt skuldbindur hann sig til að skila greinargerð og fjárhagsuppgjöri um verkefnið og hlíta öðrum skilmálum ráðuneytisins. Þá skal taka fram í kynningarefni að mennta- og barnamálaráðuneyti styrki verkefnið.

Í samningi, skal kveðið nánar á um framkvæmd og framgang verkefnis og að lágmarki kveða á um:

a. Að styrkþega sé óheimilt að verja styrkfjárhæð til annarra þátta í starfsemi en þeirra sem kveðið er á um í samningi.

b. Að styrkþegi skuli senda ráðuneyti skýrslu um framvindu verkefna og reikningsskil í samræmi við 2. mgr. 42. gr. laga um opinber fjármál.

c. Heimild ráðuneytisins til að kalla eftir frekari upplýsingum, gögnum, bókhaldsupplýsingum og öðru sem skiptir máli við eftirlit þess með framkvæmd styrksins hvenær sem er á samningstíma.

d. Að styrkþega sé óheimilt að afhenda og/eða framselja, án skriflegs samþykkis ráðuneytisins, réttindi sín og skyldur samkvæmt samningi eða styrktarbréfi í hendur þriðja aðila.

e. Að styrkþega sé óheimilt að framselja greiðslur skv. samningi eða styrktarbréfi til þriðja aðila eða setja með öðrum hætti til tryggingar fjárskuldbindingu skv. 45. gr. laga um samningsveð, nr. 75/1997.

f. Greiðslutilhöggun framlags.

g. Að styrkþega sé skylt að tilkynna tafarlaust ef upp koma aðstæður sem tefja framkvæmd verkefnis eða koma í veg fyrir að markmiðum eða skilyrðum fyrir styrkveitingu sé fullnægt.

h. Gildistíma og úrlausn ágreiningsmála.

i. Að styrkur falli niður eftir ákveðinn tíma sé hans ekki vitjað.

Ef styrkþegi brýtur með athöfnum eða athafnaleysi gegn skilyrðum eða forsendum fyrir framlagi eða styrk í styrktarbréfi eða samningi um verkefni getur það leitt til endurskoðunar á styrkfjárhæð og/eða skapað ráðuneytinu endurkröfurétt.

Til viðbótar við framangreinda úthlutunarskilmála getur ráðherra ákveðið að setja frekari og sértæka skilmála um úthlutun framlags eða styrks til verkefnis.

7. gr.

Gildistaka ofl.

Reglur þessar eru settar með vísan til 5. gr. reglugerðar um styrkveitingar ráðherra, nr. 642/2018, sbr. 42. gr. laga um opinber fjármál, nr. 123/2015, og taka þegar gildi. Á sama tíma falla úr gildi úthlutunarreglur um styrkveitingar mennta- og menningarmálaráðherra, nr. 1155/2021.

Mennta- og barnamálaráðuneytinu, 24. nóvember 2022.

Ásmundur Daðason
Ásmundur Einar Daðason

Erna
Erna Kristín Blöndal